



Os e as participantes na xuntanza, xunto co vicerreitor do campus.

## ESPECIALISTAS DE CINCO PAÍSES AVALÍAN EN SANXENXO MEDIDAS PARA POTENCIAR O DEPORTE ENTRE AS PERSOAS MAIORES

DUVI PONTEVEDRA 02/05/2019

O grupo de investigación HealtyFit, da Facultade de de Ciencias da Educación e do Deporte, é un dos socios do proxecto europeo *In Common Sports (Intergenerational Competition as Motivation for Sport and Healthy Lifestyle of Senior Citizens)*, que ten como obxectivo central a análise dos factores que motivan ás persoas maiores a realizar deporte e actividade física e no que participan institucións académicas e municipais de España, Portugal, Italia, Hungría e Bulgaria. [+info.](#)



Preto de 50 estudantes cun evento que reuniu preto de 4000 deportistas.

## AS UNIDADES DE VOLUNTARIADO DE FISIOTERAPIA ASISTIRON A MÁIS DE 400 PARTICIPANTES NO MUNDIAL MULTISPO

EDUARDO MUÑIZ DUVI PONTEVEDRA 06/05/2019

O pasado sábado, Pontevedra celebraba a clausura do Campionato do Mundo Multisport da International Triathlon Union (ITU), que entre o 27 de abril o 4 de maio reuniu na cidade preto de 4000 deportistas e que supuxo así mesmo unha oportunidade para entrar en contacto con casos clínicos reais para preto de 50 alumnos e alumnas da Facultade de Fisioterapia, que participaron nas unidades de voluntariado coas que o centro colaborou co evento. [+info.](#)



Estudantes da Universidad Anáhuac fórmanse desde este luns em CCSS e da Comunicación.

## ALUMNADO MEXICANO AFONDA NO CAMPUS NAS CLAVES DA DIRECCIÓN PÚBLICA E EMPRESARIAL

DUVI PONTEVEDRA 06/05/2019

Achegarse á realidade diaria do labor directivo, tanto no eido empresarial como no público, da man de responsables de diferentes empresas e institucións, constitúe o eixo central do Curso de Alta Dirección en Empresas e Comunicación que desde este luns reúne na Facultade de Ciencias Sociais e da Comunicación a estudantes de posgrao da Universidad Anáhuac Xalapa, situada no estado mexicano de Veracruz. [+info.](#)



A vicerreitora Maribel Doval, primeira pola dereita, nun acto.

## A UNIVERSIDADE REFORZA O SEU COMPROMISO COS PAÍSES EN VÍAS DE DESENVOLVEMENTO CONVOCANDO BOLSAS PARA A REALIZACIÓN DE TFG E TFM


Ma DEL CARMEN ECHEVARRÍA DUVI 07/05/2019

Países da África lusófona, América do Sur e os Balcáns serán o destino das e dos estudantes da Universidade de Vigo que acaden unha das bolsas de mobilidade RSU e Axenda 2030 para a realización de Traballos Fin de Grao e Traballos Fin de Máster en países en desenvolvemento 2018-2019 que convoca a Universidade de Vigo. A iniciativa da Vicerreitoría de Responsabilidade Social, Internacionalización e Cooperación, co apoio do Servizo de Axudas ao Estudo, Bolsas e Prezos Públicos. [+info.](#)

## UNHAS XORNADAS ANALIZARÁN A NECESIDADE DE TRANSFORMAR A XUSTIZA EN CLAVE DE XÉNERO

DUVI OURENSE 07/05/2019

Os días 29, 30 e 31 de maio a Facultade de Dereito do campus de Ourense acollerá a celebración das I Xornadas Feminización e Xustiza, dirixidas polas profesoras do centro Inés C Iglesias Canle e María José Bravo Bosch. A iniciativa reunirá a especialistas de seis universidades españolas e italianas co obxectivo de analizar “a necesidade de realizar unha transformación da xustiza penal en clave de feminización para poder realizar plenamente o principio de igualdade entre homes e mulleres recoñecido constitucionalmente”. [+info.](#)



Universidade de Vigo  
Carta das xornadas



Participantes nunha edición anterior deste campamento no campus de Vigo.

## PERMANECE ABERTA A RESERVA DE PRAZA PARA O CAMPUS CAMP EN PONTEVEDRA

DUVI PONTEVEDRA 07/05/2019

Dirixido a favorecer a conciliación da vida profesional e familiar dos integrantes de profesorado, persoal de administración e servizos e alumnado, a Universidade promove desde hai máis dunha década o Campus Camp, un campamento de verán para os fillos e fillas dos e as integrantes da comunidade universitaria que desenvolve as súas actividades desde finais de xuño ata o inicio do novo curso escolar en primaria en setembro, coa excepción do mes de agosto. [+info.](#)



Representantes das entidades participantes no proxecto..

## INVESTIGADORES DA UNIVERSIDADE AVALIARÁN A VIABILIDADE AMBIENTAL DO PROXECTO QUE INCREMENTARÁ A BIODIVERSIDADE DO PORTO DE VIGO

M<sup>a</sup> DEL CAMEN ECHEVARRÍA DUVI 07/05/2019

Dentro das accións contempladas na estratexia de Crecemento Azul (Blue Growth) que está a desenvolver, o Porto de Vigo acaba de poñer en marcha o proxecto *Peiraos do Solpor*, unha iniciativa na que participan entidades públicas e privadas co obxectivo de incrementar a biodiversidade do porto vigués, a través da redución de emisións e o incremento na captación de CO<sub>2</sub>. [+info.](#)



Imaxe de grupo dunha das andainas.

## ONCE RUTAS, 730 PARTICIPANTES, UNHA CELEBRACIÓN E MOITAS IMAXES PARA O RECORDO

DUVI OURENSE 08/05/2019

A programación de rutas culturais 2018/2019 da Área de Benestar, Saúde e Deporte da Universidade de Vigo pechouse esta fin de semana e á hora de balance deste curso académico desde a organización salientan datos como as e os 730 participantes nas once andainas celebradas e momentos como a conmemoración de dúas décadas de roteiros universitarios. [+info.](#)



## A UNIVERSIDADE CONVOCA AXUDAS PARA O ALUMNADO EN CIRCUNSTANCIAS ESPECIAIS

DUVI 08/05/2019

Consciente de que parte do seu alumnado sofre circunstancias económicas ás veces moi adversas, a Universidade de Vigo aposta por poñer en marcha medidas que eviten que estas dificultades deriven no abandono dos estudos. Para isto, a institución académica ten aberta ata o 16 deste mes de maio unha [convocatoria de axudas](#) para o estudantado con circunstancias económicas ou familiares especiais que lle impiden ou dificultan afrontar os gastos derivados da actividade académica. [+info.](#)



As e os participantes escoitando as explicacións do profesor Miguel Ángel Nombela na parte máis alta do percorrido.

## PRETO DE 150 PERSOAS PARTICIPARON EN SANTA TREGA NO GEOLODÍA 19

Preto de 150 persoas participaron este domingo no monte de Santa Trega nas diferentes actividades organizadas pola Facultade de Ciencias do Mar e a Escola de Enxeñaría de Minas e Enerxía no Geolodía 19, evento que se celebra a nivel nacional e que, tras un parón dun ano, volveu organizarse na provincia de Pontevedra da man da Universidade de Vigo. “Foi un día espectacular, a xente amosouse moi interesada e recibimos moitas felicitacións, sobre todo polas temáticas tratadas”, salientou Bienvenido Diez, profesor do Departamento de Xeociencias Mariñas e Ordenación do Territorio e coordinador desta actividade na UVigo. [+info.](#)



Imaxe da gala de peche celebrada o sábado no Teatro Principal de Ourense. Imaxe: Miteu.

## UN BALANCE “MOI POSITIVO” DE 17 DÍAS DE ACTUACIÓNS

DUVI OURENSE 13/05/2019

Despois de 17 intensos días de programación, a XXIV edición da Mostra Internacional de Teatro Universitario de Ourense (Miteu) baixou este sábado o pano coa entrega de galardóns e coa actuación da Aula Universitaria de Ourense Maricastaña. Aínda despedindo ás compañías internacionais que participaron nos últimos días, desde a organización do certame salientan os bos resultados desta edición, tanto en calidade como cantidade. [+info.](#)



Nenas e nenos participantes nunha edición anterior.

## CAMPUS CAMP INCREMENTA PRAZAS NOS TRES CAMPUS

D. BESADÍO DUVI 14/05/2019

30 prazas máis para os campus de Vigo e Pontevedra e 14 para o de Ourense. [Campus Camp](#), o campamento de verán dirixido a fillas e fillos de PAS, PDI e estudantes, incrementa este ano as prazas dispoñibles nos tres campus ao pasar das 120 prazas ofertadas para o campus de Vigo e Pontevedra a 150, e de 36 a 50 no caso de Ourense. A maiores deste incremento no número de prazas ofertadas, este ano amplíase tamén ata os 14 anos a idade límite das e dos participantes. [+info.](#)





## OS INVESTIGADORES BENITO VÁZQUEZ, PABLO IZQUIERDO E ANA ULLA PARTICIPARÁN NA EDICIÓN VIGUESA DO PINT OF SCIENCE

M. DEL RÍO DUVI 15/05/2019

Os avances científicos, a investigación aplicada, a I+D... todo ten impacto na vida diaria das persoas, ás veces sen que se decaten e outras xerando debates e polémicas. A efectividade das vacinas, as posibilidades da nanotecnoloxía ou a existencia de vida noutro planeta son temas arredor dos que poden xirar conversas, por exemplo nun bar. Ese é o espírito do festival Pint of Science, que se celebra dende 2013, durante tres días simultaneamente en cidades de todo el mundo, entre elas Vigo, que participa por segunda vez. [+info.](#)

## UN NOVO VÍDEO DE DIVULGARE ACHEGA A IMPORTANCIA DAS ESPECIES POLINIZADORAS NA ACTIVIDADE AGRÍCOLA

DUVI 16/05/2019

Divulgare, o proxecto de divulgación do Grupo de Ecoloxía e Evolución de Plantas da Universidade de Vigo, acaba de presentar *La importancia de los polinizadores en los cultivos*, un novo vídeo no que se fai fincapé na importancia de distintos animais coma vectores de polinización nos cultivos, algo que repercute na mellora das colleitas e na redución do seu impacto ambiental. [+info.](#)

## UNHA 'ROLDIA' DE CIENCIA A CARGO DE TRES INVESTIGADORES DO CAMPUS

DUVI OURENSE 16/05/2019

Por segundo ano consecutivo, Ourense únese á celebración de Pint of Science, un festival internacional de divulgación científica con presenza en 73 cidades españolas e 400 de todo o mundo que se desenvolverá do luns 20 ao mércores 22 de maio. Nel participarán tres investigadores do campus de Ourense, como son José Ramón Salgueiro, Manuel Fernández e Xurxo Costoya, que intentarán achegar dun xeito ameno ao público asistente os seus ámbitos de traballo, neste caso a física. [+info.](#)



*A institución provincial fixo público o fallo dos III Sofía Novoa Ortiz..*

## A DEPUTACIÓN RECOÑECE OS TRABALLOS DE SEIS EGRESADAS POLO SEU COMPROMISO COA IGUALDADE

DUVI PONTEVEDRA 20/05/2019

Pór de manifesto as desigualdades existentes entre homes e mulleres a través do intercambio de roles tradicionais, analizar a linguaxe sexista nas traducións ou a representación da muller nos dicionarios, deseñar materiais que contribúan á incorporación da perspectiva de xénero ás aulas, abordar a existencia de profesións e estudos feminizados e afondar nas desigualdades entre homes e mulleres no ámbito científico tecnolóxico. [+info.](#)



*Alumnado realizando tarefas de voluntariado.*

## A OMA SEGUE NA PROCURA DE VOLUNTARIADO PARA MINIMIZAR OS IMPACTOS AMBIENTAIS NO CAMPUS DE VIGO

DUVI 20/05/2019

A Oficina de Medio Ambiente da Universidade de Vigo (OMA) está a procurar voluntarios e voluntarias con formación e inquéntanzas ambientais e con interese en desenvolver traballos que axuden a diminuílo grao de alteración da natureza na contorna do campus de Vigo. As tarefas a desenvolver están destinadas a involucrar ao alumnado na xestión ambiental e, o mesmo tempo, fomentar a “participación nos estudos, educación e sensibilización respecto ao medio ambiente”, salienta Sergio Ramos, técnico superior da OMA. [+info.](#)



*As institucións académicas desenvolverán medidas previstas no Pacto de Estado*

## XUNTA E UNIVERSIDADES GALEGAS COLABORARÁN NA PREVENCIÓN E LOITA CONTRA A VIOLENCIA DE XÉNERO

DUVI 21/05/2019

O vicepresidente da Xunta, Alfonso Rueda, asinou este mediodía tres convenios de colaboración cos reitores das universidades de Vigo, Manuel Reigosa; Santiago de Compostela, Antonio López e A Coruña, Julio Abalde co obxectivo de colaborar na prevención e erradicación da violencia de xénero. Estes acordos, dotados con 100.000 euros cada un, permitirán ás universidades desenvolver medidas previstas no Pacto de Estado contra a Violencia de Xénero. [+info.](#)



Gianluca Marino é investigador do CIM-UVigo e profesor honorario da Universidade Nacional Australiana.

## GIANLUCA MARINO AFONDA NO CICLO CAFÉ CON SAL NAS CARACTERÍSTICAS PRINCIPAIS DOS 'CICLOS DA IDADE DE XEO'

DUVI 21/05/2019

O investigador do Centro de Investigación Mariña da Universidade de Vigo Gianluca Marino, quen exerce tamén como profesor honorario na Universidade Nacional Australiana, protagonizou este martes unha nova sesión do [ciclo Café con Sal](#). Fíxoo cunha intervención, *The nature of (palaeo) climate change*, na que afondou nas características principais dos denominados 'ciclos da idade de xeo', na caracterización do patrón de variabilidade e as súas causas, así como nalgúns consideracións que axudan a explotar o rexistro do paleoclima en estudos de sensibilidade climática. [+info.](#)



Alumnado que participará nos seminarios nas dúas universidades alemás.

## AS UNIVERSIDADES DE BREMERHAVEN E HTW SAAR, PRÓXIMO DESTINO PARA 22 ESTUDANTES DO CAMPUS

ROSA TEDÍN DUVI OURENSE 22/05/2019

No marco da súa aposta pola internacionalización, a Facultade de Ciencias Empresarias e Turismo do campus de Ourense desenvolve coas universidades alemás HTW Saar, de Saarbrücken, e a de Bremerhaven diferentes iniciativas que este curso académico se amplían. Así, 22 das e dos seus estudantes dos graos de Turismo e de Administración e Dirección de Empresas participarán no mes de xuño en seminarios internacionais dunha semana de duración nesas institucións académicas nos que terán a oportunidade de vivir en primeira persoa outra realidade educativa. [+info.](#)



O investigador Luis Navarro..

## A BIODIVERSIDADE CONTADA NUN MINUTO

DUVI 22/05/2019

Segundo datos de Nacións Unidas, nos próximos anos desaparecerá máis do 10% das especies que existen hoxe en día no planeta Terra, estando en perigo de extinción un millón das mesmas. Ante esta realidade, a Unidade de Cultura Científica e da Innovación (UCC+i) da Universidade de Vigo e o director do Laboratorio de Ecoloxía e Evolución de Plantas e responsable de Divulgaré, Luis Navarro, colaboraron na elaboración dun vídeo para dar a coñecer entre a sociedade os principais datos relativos á biodiversidade e a necesidade de preservala. [+info.](#)



As estadias reuniron alumnado de diferentes países e titulacións. Foto: Alejandra Castro.

## ESTUDANTES DO CAMPUS DESEÑAN PROXECTOS A PROL DA INFANCIA E DAS MULLERES EN BRASIL E URUGUAI

EDUARDO MUÑOZ DUVI PONTEVEDRA 24/05/2019

Un filtro de auga de baixo custo, unha plataforma de axuda á inserción laboral de mulleres en situación de risco, unha aplicación para combater a obesidade infantil e unha *app* que propón xogos a nenos e nenas. Estes son catro das propostas que, coa participación de catro estudantes do campus, alumnado de diferentes países e titulacións desenvolveu nas últimas semanas en Brasil e Uruguai no marco das actividades do proxecto *Lapassion (Latin America Practices and Soft Skills for an Innovation Oriented Network)*, unha iniciativa financiada polo programa Erasmus. [+info.](#)



O alumnado coas vicerreitoras Maribel Doval e Esther de Blas..

## CINCO ESTUDANTES ABREN A COLABORACIÓN CO ANAND INTERNATIONAL COLLEGE OF ENGINEERING DE JAIPUR

ROSA TEDÍN DUVI OURENSE 27/05/2019

Akshita Audichya, Tanvi Mathur, Shivam Sharma, Chakshita Kumawat e Manvendra Singh son cinco estudantes de grao de diferentes enxeñarías procedentes do Anand International College of Engineering, ubicado en Jaipur, na India. Eles e elas coinciden en Ourense co obxectivo de facer durante un mes unha estadia en diferentes grupos de investigación da Universidade de Vigo no marco da liña de colaboración que están a abrir as dúas institución académicas. [+info.](#)

## UN FORO DE DEBATE INTERNACIONAL PARA AFONDAR NAS RELACIÓNS CULTURAIS ENTRE EUROPA E XAPÓN

DUVI PONTEVEDRA 28/05/2019

As influencias mutuas, a interacción artística e o intercambio cultural entre Oriente e Occidente e, nomeadamente, entre Europa e Xapón, tanto na arte e na estética, como na fotografía, na cultura popular, no deseño e na moda. Estes serán os eixos da análise do sétimo *workshop* internacional da asociación de investigadores *Mutual Images*, que os días 3 e 4 de xuño se desenvolverá na sede da Vicerreitoría do campus. Unha vintena de investigadores e investigadoras, procedentes de universidades de España, Xapón Reino Unido, Estados Unidos, Portugal e Líbano protagonizarán un simposio que, da man do grupo de investigación dx5, da Facultade de Belas Artes, desenvolverase por primeira vez en España. [+info.](#)



O "workshop" de Mutual Images desenvolverase os días 3 e 4 de xuño.





Esta é a primeira convocatoria destas características que realiza a Universidade.

## UNHA APOSTA POLA FORMACIÓN INTEGRAL DO ALUMNADO A TRAVÉS DE BOLSAS DE MOBILIDADE PARA A REALIZACIÓN DE ACTIVIDADES

MA<sup>a</sup> DEL CARMEN ECHEVARRÍA DUVI 28/05/2019

Ata o 24 de xuño poderá presentar as súas solicitudes o alumnado de grao e mestrado da Universidade de Vigo que queira optar a unha das bolsas de mobilidade para a realización de actividades de carácter formativo no curso 2018/2019 que convoca, por primeira vez, a Vicerreitoría de Captación de Alumnado, Estudiantes e Extensión Universitaria. Coa finalidade de fomentar a participación do estudantado en proxectos e eventos de carácter cultural, científico, de especialización ou perfeccionamento, que complementen a súa formación, a convocatoria establece tres modalidades. [+info.](#)



## ESTUDANTES DE LINGUAS DE EEUU VISITAN O CAMPUS

DUVI 28/05/2019

Cursan *Global Studies and World Languages*, un programa multidisciplinar centrado nas competencias lingüísticas e interculturais e, para completar a súa formación están a visitar España. Trátase dun grupo de estudantes da Winona State University de Minnessota que, dentro desta viaxe de estudos elixiron o campus de Vigo como un dos seus destinos. Na xornada de onte luns achegáronse a coñecer a Facultade de Filoloxía e Tradución, as instalacións e infraestruturas e o Centro de Investigacións Biomédicas. [+info.](#)



Trata de mellorar a calidade da educación ao proporcionar contextos docentes máis motivadores.

## UN PROXECTO INTERNACIONAL PARA FOMENTAR A APRENDIZAXE BASEADA EN PROBLEMAS

DUVI 29/05/2019

Atrás quedaron as clases maxistras, o papel pasivo do alumnado e a memorización como técnica de aprendizaxe. As universidades levan anos traballando en novos modelos educativos, prácticas académicas innovadoras e implantación de novas tecnoloxías aplicadas á docencia. Unha desas iniciativas é o proxecto ADLES (Active Digital Learning Environments in Schools), unha proposta internacional que a Universidade de Vigo impulsa conxuntamente con outras institucións de Italia, Grecia, Reino Unido, Dinamarca, Portugal e Turquía para o desenvolvemento da metodoloxía ABP (Aprendizaxe Baseado en Problemas). [+info.](#)



Imaxe de coordinadoras e participantes.

## ESPECIALISTAS SEIS UNIVERSIDADES AFONDAN NAS CLAVES PARA UNHA XUSTIZA MÁIS IGUALITARIA

ROSA TEDÍN DUVI OURENSE 29/05/2019

“Estas xornadas son unha boa ocasión para comentar temas de actualidade no eido xurídico e para seguir defendendo os conceptos de igualdade e dereitos fundamentais desde unha vertente pluridisciplinar”. Deste xeito, presentaron este mércores as profesoras da Facultade de Dereito Inés Iglesias Canle e María José Bravo Bosch as *I Xornadas Feminización e Xustiza* que ata o venres se celebran baixo a súa dirección no campus de Ourense. A iniciativa reúne a especialistas de seis universidades españolas e italianas para afondar nas claves para avanzar cara unha xustiza máis igualitaria. [+info.](#)

10



O lanzamento tivo lugar na Tecnopolo. Foto: Lena Repetskaya.

## UN GLOBO ESTRATOSFÉRICO LANZA A COLABORACIÓN EN DIVULGACIÓN CIENTÍFICA ENTRE O CONSELLO SOCIAL E O PARQUE TECNOLÓXICO DE GALICIA

DUVI OURENSE 30/05/2019

O Consello Social da Universidade de Vigo e o Parque Tecnolóxico de Galicia (Tecnopole) inician unha nova liña de colaboración para levar a cabo iniciativas conxuntas de divulgación científica entre as e os máis novos e para trasladar á sociedade no seu conxunto o valor da ciencia, o coñecemento e a innovación. A posta en marcha desta alianza escenificouse este xoves co lanzamento dun globo estratosférico por parte de alumnado das Aulas Tecnópole. [+info.](#)



Xavier Simón Fernández nunha xornada sobre comedores escolares celebrada no campus de Vigo.

## A PROL DUNHA ALIMENTACIÓN MÁIS SOSTIBLE NAS ESCOLAS, A UNIVERSIDADE LANZA UN CURSO SOBRE COMEDORES ECOLÓXICOS

A alimentación implica a todo o mundo, a maiores e a pequenos, ao medio ambiente e á cadea de produción. Nos comedores escolares, o aspecto alimenticio vólvese máis relevante, xa que, máis aló da inxesta de alimentos, tamén é unha contorna idónea para ensinar bos hábitos dende as idades máis temperás. Neste sentido, implementar eco-comedores nas escolas, lugares onde prime a calidade e a orixe dos alimentos, resulta importante cara á procura dunha boa saúde dos cativos e cativas. [+info.](#)



Preto de 350 escolares participan na EE Forestal na fase final de Ponteciencia.



Preto de 350 escolares participan na EE Forestal na fase final de Ponteciencia.



A través da actividade "Descubriendo o norte"

## O FUTURO DA CIENCIA EXHÍBESE NO CAMPUS

EDUARDO MUÑIZ DUVI PONTEVEDRA 31/05/2019

Preto de 350 alumnos e alumnas de nove centros de primaria da cidade participaron na mañá deste venres na Escola de Enxeñaría Forestal na presentación dos resultados dun total de 19 experimentos desenvolvidos nas aulas no que foi o arranque da Feira da Miniciencia, a fase final do programa Ponteciencia, que o Concello de Pontevedra promove xunto coa Universidade de Vigo co propósito de espertar o interese pola investigación científica entre as novas xeracións. A estes 19 proxectos súmanse as 20 investigacións realizadas por máis de 50 estudantes de cinco centros de secundaria e ás oito investigacións realizadas por nove familias para un total de 47 investigacións que serán presentadas na sexta edición deste evento. [+info.](#)

## A UNIVERSIDADE ABRIRÁ AS SÚAS PORTAS AO ALUMNADO DE ENSINO MEDIO E ÁS SÚAS FAMILIAS DO 18 AO 20 DE XUÑO

D. BESADÍO DUVI 31/05/2019

Charlas, talleres, visitas guiadas, exhibicións, obradoiros... A Universidade de Vigo celebrará do 18 ao 20 de xuño unha gran Xornada de Portas Abertas, XOÜ, tres días nos que a institución convida ao alumnado de ensino medio e ás súas familias a achegarse aos campus e coñecer máis de preto as diferentes escolas e facultades e a vida universitaria. Será o [18 no campus de Ourense](#), o [19 en Pontevedra](#) e o [20 en Vigo](#) e as persoas interesadas poderán achegarse sen necesidade de realizar ningún tipo de inscrición previa, salvo que se trate de grupos de máis de 15 integrantes. [+info.](#)

## A REDE GALEGA DE BIOMATERIAIS FOMENTA AS VOCACIÓNS CIENTÍFICAS ABRINDO A SÚA ACTIVIDADE A ESCOLARES

DUVI 31/05/2019

Biomateriais para aplicacións médicas, nanorrecubrimentos biocompatibles e técnicas innovadoras de diagnose de tecidos vivos. Estes son só algúns dos campos de traballo da Rede Galega de Biomateriais (RGB), que aglutina 70 investigadores das universidades de Vigo e de Santiago para desenvolver materiais avanzados aplicables na práctica clínica. Un ano máis, os científicos e científicas do campus vigués adscritos a esta rede aceptaron o reto de compartir os seus coñecementos con alumnos e alumnas de Primaria. [+info.](#)



Participantes na actividade de zumba.

## ARREDOR DE 120 PERSOAS PARTICIPARON NAS ACTIVIDADES DE PECHE DAS ESCOLAS DEPORTIVAS

DUVI OURENSE 31/05/2019

A Área de Benestar, Saúde e Deporte do campus de Ourense pechou esta semana a programación de escolas deportivas que se desenvolveu ao longo deste curso académico e fíxoo con dúas sesións especiais de zumba e bicicleta estática de balde e abertas a todas as persoas interesadas. As masterclass, que tiveron lugar o mércores e xoves pola tarde noite, reuniron a arredor de 120 persoas na zona exterior entre o Pavillón de Deportes e o edificio do Campus da Auga. Na actividade colaborou o centro Aqa Ourense. [+info.](#)



---

## UNIVERSIDADE DE VIGO

### **Unidade de Análisis e Programas.**

Edificio Filomena Dato.

Planta Baixa.

36310 Vigo (Pontevedra)

986.818.689 986.818.640